

otootoga

Fai mai Maori e faailogalanu

Ua faaleo manino se lagona o fanau Maori i le iunivesite i Otako, i le faiga o loo faaese ai i latou e le a’oga. I le tausaga lua e toe su’e ai i latou i se su’ega e saili ai ni e fa’aauau atu su’esu’ega i tusipasi foma’i ma isi faiva tau le ola maloloina. E manatu i latou o se faiga faailogalanu lenei.

Aso o le niu 2 Setema

O le aso 2 o Setema na faailoga ai e le lalolagi le laau o le niu. O lea faamamaluga e amana'ia ai le sao iloga a lenei laau i le tausiga o se vaega tele o tagata i nuu e maua ai. I Asia ma le Pasefika ua avea ai le niu ma laau o le ola, e taumamafa ai ma fau ai fale a ua avea foi ma se oloa e faatau atu.

Pulea potua'oga e pepe a le P

O le to'atele o fanau o loo faia
amioga le taupulea i a'oga o na
sa tagofia e o latou tina le vailaau
o le P a o tauave. Atoa foi le pia
ua faamaonia lona afaina ai o le
faiai o le pepe. O fanau nei ua fai
ma sasa i a'oga ma faia'oga.
O se pasene lapo'a o lea vasega
o fanau a Maori.

Tasi i le vaiaso le pepe P

Fai mai se foma'i su'esu'e e tasi
i le vaiaso se pepe kiui e fanau
i le Starship e afaina i le P. Lona
uiga e 52 pepe e feola i lea
falema'i ua faamaonia le afaina.
I le fai a'e o le amio le pulea i
a'oga, ua avea lea ma se
popolega tele i pulega ma isi
matua. Na osofa'i se faia'oga e se
tama i le vaiaso talu ai.

Se tala mai Samoa

I Samoa ua talosaga se faamasino e toloi le pasiga o le tulafono, e avanoa ai faia'o'ga e fa'aaoga le malosi e taofiofi ai fanau ulavavale.

“mafaufauga o le vaiaso”

A e alofa i le moni, e te amana'ia foi
lana avefeau. *Pole ma Papa*



IA POPOTO SAMOA UMA E FAITAU. Faitau ma le Tusitusi o le sini autu o le Aso Faailoga a le Lalolagi, ua togia ai le aso 8 o Setema. E atagia i atina'e a se atunuu le tulaga o ona tagata i le faitau ma le tusitusi. Ata o le Ofisa o A'oga a Samoa 1924. I latou na āsa le gasū.

Sauni mataqaluega a'oga e faauilavea i McAuley



O loo feagai le a'oga a teine i McAuley ma se nunu faapulega. E pei ona lipotia se eseese i le va o le pulega ma matua, e mafua i le le talimana'o o le pulega i mana'oga taugagana o i latou.

I le aunoa se fofo ua faailoa ai nei se fuafuaga a le matagaluega e ono faauilavea; lona uiga e ono suia le pulega e se komesina tofia le matagaluega, pe uia foi se tasi auala ua manatu e tataui.

Na tusi atu foi le matagaluega i le
pulega a le lotu mo sana gaioiga, ina ia
foina le faafitauli a o lei oo atu i le laasaga
faauilavea.

I le taimi nei o loo ave aso malolo o le
pule talu ni fetoa'iga ma matua ma le

fanau a'oga. Sa ta'ua i lipoti ua mavae le molia atu o le tetee a matua ma fanau i luma o le fono a le komiti faafoe. E nofoia ai le potu fono e se potopotoga e 200 matua ma fanau, e faailoa la latou tetee.

I le fatu o le fetoa'iga le faaseā a fanau ma matua i le tapenaga o faia'oga mo le faiva. To'atele fanau e auai i mataupu o gagana e iai le Samoa, ae leai ni faia'oga.

Ua faaseā fanau i le faafaigaluega o faia’oga asiiasi (relief teachers) e manatu i latou o ni tausī pepe, ae o loo naunau i ni faia’oga e atoatoa taimi i le galuega.

O McAuley o se tasi a'oga ta'uleleia i ausiga, aemaise i le gagana Samoa, le faaolaolaina o le tu ma le aga e fanau.

Ripoti o le Vaiaso:

Mana'omia e a'oga le lagolago i faafitauli tauleamio

Ua mana'omia vave e a'oga le lagolago a le malo i le sasao a'e o faafitauli tauleamio ua loa le matauina.


E le gata ua afaina ai le gasologa masani o tiute ma feau a le pulega, a o tau faaopopo e fesoota'i tonu i le faasoa tauseleni a a'oga.

I se lipoti a le Matagaluega o Numera Faamaumau na faamaonia ai le faia'e o le numera o fanau e tutuli pe faamalolo mai a'oga ona o amioga le taupulea.

Na faamaonia foi i le lipoti le mafuli o lea numera i fanau Maori ma Pasefika. O i latou nei mai a'oga e maulalo tesile e faatusatusa i a'oga o tesile mauualuluga.

E molimau foi le lipoti i le faumalo o tama i le numera o i latou e faamalolo faavaitaimi pe tuli motu mai a'oga. E tasi i le tolu avanoa e ono faasala ai faavaitaimi, ae tasi i le fa e tuli motu ai se tama e faatusatusa i teine. Ae iloga le tulaga o fanau Maori i lo isi uma.

Na saunoa le peresitene o le PPTA, Jack Boyle, e faaalua le mana'oga mo faia'oga ma faigaluega fesoasoani, i le tulaga taufaasoasoa o alaga'oa e tali atu ai. Talu ai le 'a'u, ua toe faae'e atu ai lena avega i luga o faia'oga, ma aafia ai o latou tiute masani.



Ua faaalua ni molimau i le suiga aliali mai i fanau Maori i totonu o A'oga Siata. E faavae ai le finau a faipule pei o Jackson o le tataui i le malo ona lagolago lea faiga. Ua tuua'iina le malo i le taumau i taofi e le faavae.

E feagai tonu le ripoti ma le faailoaga o le tetee a le aufaigaluega lagolago faatatau i o latou totogi. Ta'utino fo'i latou i le mea e tasi, ua le nafataulima i le malosi ma alaga'oa o iai le tuga o le lu'i.

To'atele e galulue e sili atu i o latou itula faigaluega ae foliga e leai se lagolago mai a le malo. E itiiti foi se fesoasoani mai a pulega ona o le 'a'u o le faasoa.

Pau le tali a nisi pulega o le faamalolo mo sina taimi, ae toe taliu mai foi ma fa'aauau le tuligasi'a. O nisi a'oga ua manatu e tosi le tua'oi e le toe

tuuavanoa ai, ma avatu i ai le tusi te'a faamaoni. A o lena fofa e le maua ai se ta'uleleia o se pulega.

O amio le pulea e aafia ai le faaoolima i isi tamaiti atoa ma faia'oga, aga sauva taufaamata'u e aafia ai lagona o isi, le soli o tulafono a le a'oga e aafia ai le avatu i totonu o vailaau faasaina.

Ua faamaonia i sailiga le fesoota'iga o amio ma le tagofia e tina o le P, le pia ma isi vailaau faasaina, a o tauave pepe.

Ua omia pulega i le va o le papa ma le mea malo; pe tuuavanoa i le amio le pulea ma ta'umamasagia ai le pule, pe tausisi i le tulafono.

Avanoa se iloiloga pe a faate'a se tasi o le fanau

O soo se tasi o le fanau e tuli mai le a'oga i se faiga faaletumau pe tuli motu foi, o le a avanoa i se iloiloga e tusa ma se fuafuaga fou o loo ua faatalanoaina.

I le faiga sa iai muamua e pule le komiti faafoe a se a'oga i ana tuutuuga o se faasalaga; i le umi o le taimi, e aunoa ma le soona aia mai o le matagaluega poo se tasi pule i luga a'e.

Peita'i la ua faatu nei sea fuafuaga e tausolomua ai le komisi o Aia tataui ma le komesina a le Fanau, e tofia ai ni laulau faaitumalo e nafataulima sea tiute.

O nei laulau e faatau i ai faameo a aiga e ana fanau ua tutuli, o le a latou iloiloaina le mataupu ma fai i ai sa latou faaiuga e fua i le tonu ma le sa'o o le faasalaga ua faia.

I le taimi nei e le o manino pe iai se paoa faaletulafono o laulau e sui ai faaiuga a komiti. Afai o lea, e



Itumalo o Northland i le motu i Matu ua malilie e tauavamea i le fuafuaga ua faataoto. E iloa i se taimi.

mana'omia se teuteuga i le tulafono e auala ai.

E malosi le finau e tataui ona utagia aia tataui a fanau, aemaise pe a atagia se uiga faapito i faasalaga e fai. O se tasi aiga na momoli la latou faasea i le komesina ona e manatu ua mamafa le faasalaga e fua i le gaioiga sa fai. O se tama a'oga na maua ai se pepa o laulaau faasaina, ma faasala i le 6 masina. E taofi le aiga ua

mamafa tele le faasalaga.

O loo saili nei se itumalo na te tauavaina le fuafuaga; afai e apoina e a'oga ma matua, e ono faasafua atu foi i isi itumalo a le atunuu.

O le tasi o folafolaga a le Leipa i le tausaga talu ai, o le tofia o se pulega tuto'atasi e iloiloaina tagi faasaga i a'oga ma latou faaiuga e aafia ai fanau.

O loo taulamua le asosi a komiti faafoe aoao i le tapenaina o lenei taulagalaga.

E sui faiga ae tumau faavae

Folasaga

E fa’atulou ma fa’atalofa atu i le paia i le susu o le Aufaigaluega a le Atua, afio i lau Afioga i le Tapa’au ma tulaga fa’alupe o le Iunivesite, fa’apea le paia ma le mamalu o le atunu’u i ona Tupu ma ona Ee, aemaise le mamalu i le au Puputoa ma le au Fueloloa o le Atunu’u. Talofa lava.

O le a vaipā ia lo’u gutu ne’i mea ane ua sipa se lamaga i se fa’amatalaga ona faitauina lea o lo’u tagata. O lena ua nofofale i le ‘a’ai o finagalo le ‘autū o lenei fa’afaletui e fa’apea, “e sui faiga ae tumau fa’avae.”

O ‘ese’esega o upu: faiga ma le suiga.

O upu nei o le FAIGA ma SUIGA e tatau ona matua autala ma āu’ili’ili lelei lona ‘ese’esega, ona o lea ua taumafai ni isi e fa’apea mai, o faiga o suiga lava ia. Ae peita’i o nei upu e lua e ‘ese’ese o lā uiga ma le fa’atinoga. O le uiga o le upu FAIGA, e sau mai le upu FAI. O lona uiga o se mea e faia e se tagata po’o le faatinoga o le upu faiga. O Faiga la, o lea e ave i ai le fa’amamafa a le faipepa, o faiga ua afaina ma lavasiga ai Fa’avae taoto o le Aganu’u.

O le fesili la e ao ona mua’i manino, “E fa’apefea ona tumau Fa’avae pe afai e sui faiga e fa’atino ai Fa’avae.”

Ae peita’i o ni suiga lelei o le soifuaga i Samoa nei, e mafua mai i ni a’afiaga o tu ma aga mai fafo mo le atia’eina o le soifuaga i totonu o aiga, nu’u ma le atunu’u, o le ‘ā lē tāēa lea i le tautalaga. Ou te talitonu o ni suiga lelei e fetau lelei i lo tatou soifuaga, o se tulaga lelei e tatau ona aputiputi.

Ae peita’i e iai fo’i suiga i totonu o lo tatou atunu’u ua alia’e mai, ona o a’afiaga o tu ma aga mai fafo, lea ua le mafai ona fa’amalieina ona tulaga lelei ma le matagofie e pei ona vaaia i fafo, talu ai ona e lē ‘o nafatia e o tatou tagata ona ‘ausia le tau po’o mea faitino e fa’amalieina ai tulaga lelei ma le matagofie o ia suiga, ma e tele lā ni fa’afitauli ua tula’i mai ona o lea tulaga.

O le a taoto ia la lea tulaga i suiga fou, ae o le a aga’i sa’u fa’amamafa i Faiga ua afaina ai fa’avae taoto o le Aganu’u ma Agaifanua o aiga, nu’u ma le atunuu, ina ua sui faiga lea ua afaina ma satia ai FA’AVAE. O le upu la Faiga fou, o se mea ua faia e tagata Samoa i Aganu’u ma Agaifanua ua oia ai Fa’avae taoto o le Aganu’u.

Ou te talitonu e ao ona malamalama lelei i le uiga o le upu AGANU’U ma le upu AGAIFANUA. O le Aganu’u ma le Agaifanua i le fa’auigaina e le Tulafono o Fanua ma Suafa 1981 i lona Fuaiupu 2 (a)(b) e faapea:

“Aganuu ma Agaifanua” po’o aganuu

ma agaifanua a Samoa, o lona uiga o aganuu ma agaifanua a Samoa ua talia e pei ona fa’amamaluina i taimi e fa’asino i ai ma e aofia ai;

□ tulaga fa’avae tau le Aganu’u ma Agaifanua ua talia e tagata Samoa i le tulaga aoao ma -

□ Aganuu ma Agaifanua e pei ona o lo’o fa’amamaluina e fa’atatau i se nofoaga po o se mataupu fa’apitoa.

O lo’o matuā manino lelei le Tulafono i lona fa’ata’atiaina o fa’avae tau le aganu’u ma le agaifanua ua talia e tagata Samoa i le tulaga āoāo. O le aganu’u lā ma le agaifanua o fa’avae o matai Samoa i lona tulaga aoao, o le “MATAI FILIFILIA ma le MATAI TOFIA,” lea o le a aga’i i ai se fa’amatalaga i lenei taeao i le afaina o Fa’avae ona ua sui Faiga i le faasafuaina o suafa matai Sa’o.

O le Matai Filifilia ua taliaina i lona tulaga aoao, o le suafa matai e pulea fa’a-suli. I se isi fa’aupuga o le suafa e filifili e Suli. O le matai filifilia lā, o le matai sa’o, o le pule poo le aia tatau a suli e filifili ai so latou matai sa’o e aga i ai le pulea ma le tausiga o measina a le aiga ma le suafa.

O le Matai Tofia, o ni matai e tofia e le matai filifilia po’o le matai sa’o e fesoasoani i le fa’afoeina o le aiga ma le puipuiga o tofi ma measina a suli o le suafa sa’o. Ae le gata i lea, ia sologa lelei le laina o feso’ota’iga ma pulega lelei i totonu o le aiga.

Ma o lea la o lo’o manino lelei i le folasiaina e le Tulafono o Fanua ma Suafa i le tulaga Fa’avae o suafa Matai Sa’o ua talia e Samoa i lona tulaga aoao e tatau lava ona tasi.

O le matai na filifili e suli, o se filifiliga e fai to’atele e filifili se numera tasi. I se isi fa’aupuga, o le filifiliga a suli e filifili se Matai Sa’o e tasi. Ma suafa matai Tofia, e tofia to’atasi e le matai filifilia po’o le matai sa’o ni matai se to’atele po’o ni matai pitovao e fesoasoani i le fa’atautaia ma le fa’afoeina o le aiga ma puipui tofi ma measina a suli o le suafa filifilia po’o le suafa sa’o.

O se vaivaiga la o lo’o taumafai e autalatala atu e fa’apea, o lea ua folasia manino i fa’avae o le aganu’u, e iai suafa matai e mafai ona fa’asafua, e iai fo’i suafa matai e lē mafai ona fa’asafua e tusa ai ma le fa’amalieina o mana’oga o le Aganuu.

Ou te lē ‘o talanoa atu lā i le fa’amalieina o le tupu ma ola o se aiga, po’o le fa’amalieina o se mana’o o se suli po’o se tagata. O le tulaga o lo’o taumafai e talatala atu, o le afaina ma lavasiga e tula’i mai, pe afai e le mafai ona fa’amalieina mana’oga fa’avae o le aganu’u, e ala lea i le fa’asafua o suafa matai sa’o o aiga.

O mana’oga fa’avae o le Aganu’u, o le suafa matai filifili ua i ai ona lagisoifua e fa’apei, o le pule, o fa’amanuiaga, o lona fa’asinomaga, o tiute ma matafaioi e le mafai e le suafa matai tofia po’o matai pitovao ona agava’a i ai, ua na o le matai filifilia lava po’o le matai Sa’o e agava’a i ai.

O tapu ma sāsā o se suafa Sa’o, o le agaifanua lea e fitoitonu i se suafa sa’o i totonu o lona lava nu’u e le mafai ona faatinoina i se isi nuu. Ma o lea faavae o lo’o faamanino lelei mai e le (b) o le Tulafono o Fanua ma Suafa e faapea, “o se aganuu ma agaifanua e faatatau i se nofoaga po’o se mataupu fa’apitoa.”

O le mataupu fa’apitoa la, o tapu ma sasa o le suafa Siaki e tatau ona aloaia ma fa’aaloalogia lona fa’atinoina i totonu o le nuu lava o Siaki, peita’i e le mafai ona fa’atinoa lea tualaga i se isi nu’u. O le uiga lea ma le fa’atinoina o le agaifanua. O ni aga e fa’asino lava i le fanua po’o le suafa Siaki i lona lava nu’u. o le uiga fo’i lea e tele ona faalogoina ai le upu lenei, “E tupu lava le tagata i lona nu’u.”

Fa’asafua o Matai Sa’o o le fa’ataute’e i le Tulafono aganuu ma agaifanua.

O le fa’asafuaina la o suafa matai sa’o, o le fa’ataute’e lea i le Tulafono, Aganuu ma Agaifanua a Samoa e tusa ma lona tulaga fa’avae. Auā o suafa matai sa’o i lona tulaga fa’avae o le pule ma le aia tatau a suli ma le aiga potopoto atoa e filifili ai se matai sa’o.

Afai la ae filifili fa’aitūpaepae, pe fa’afuaifale, pe fa’amatāfale se suafa sa’o, o lona uiga ua malepe le fa’avae o le pule ma aia tatau a suli uma ma le aiga-potopoto e filifili ai se matai sa’o e tusa ai o Tu ma Aganuu o lo’o fa’ata’oto mai e le Tulafono o Fanua ma Suafa.

O le fa’apea mai la o le autu e sui faiga ae tumau fa’avae, o se fuaitau e faigata ona taliaina e le faipepa, ona ua le tusa ai ma Aganu’u ma Agaifanua a Samoa i lona tulaga fa’avae ma lona taliaina aoao tetele.

Sui faiga ae tumau fa’avae.

O le autalaina o lenei fuaitau po’o lenei fatua’iupu, o se fatugagana o lo’o fa’alogoina pea i taimi e utuvagagana ai faleupolu. O se fatugagana po’o se fatua’iupu, o lo’o talatala ai le ‘atoponapona a tulatoa ma tula o malae o le atunu’u. Ae o se muāgagana fo’i o lo’o fai ma suaga a le mamalu lautele o le atunu’u i talanoaga faifai pea.

O lenei fatugagana po’o lenei fatua’iupu e ao ona tamua i ai se talitonuga a lo’u tagata, pe o se fuaitau e sa’o ma tonu e tusa ai ma le soifuaga o le tagata Samoa i Tu ma Aga a ona fa’asinomaga. O le mea lea ou te fa’apea atu ai, ou te le ioeina lea fuaitau, “e sui faiga ae tumau fa’avae.” E sui loa faiga,

Faasoa o le Vaiaso: E sui faiga ae tumau faavae—2

ua malepe fo'i fa'avae. I se isi fa'aupuga, e sui loa faiga, ua leai se taua o Fa'avae.

O Iesu Keriso lava ia e le liu ananafi ma le asō e oo lava i le fa'avavau. O ia foi na saunoa, “Ou te le'i sau e talepe le Tulafono ae ia fa'aatoatoa”. O le tala foi a le Tusi a Failauga 1: 9, “E leai se mea fou i lalo o le la.” O lona uiga, so'o se fa'avae pe fa'aleagaga pe faaleāganuu e tumau e fa'avavau.

O lenei fatua'iupu po'o lenei fatugagana ua masani ona fa'aaoga e faleupolu, e malie i le faalogo ae peita'i o lona fa'aaogaina e fai lea ma 'alofaga po'o se si'omaga e lalafi ai i tua faleupolu i le faia o se mea sese po'o se mea fou e suia ma afaina ai fa'avae o le mea o lo'o fetalai i ai.

O le mea lea ua tatau ai i le au puputoa o Afio'aga, Iunivesite, Matagaluga o Tu ma Aganuu ma le Faamasinoga ona ta'afi manino, ta'afi talatala ma ta'afi nonoa e uiga i lenei fatugagana po'o lenei fatua'iupu, pe ua talafeagai lea fuaitau i le fa'aaogaina i le gagana tautala i totonu o a'oga.

O le mea lea, ou te fa'afetaia ai i le tofa ua ae i le Tapa'au ma le mamalu o i latou o le Iunivesite o lo'o taulamua i le autalaina o lenei autu, auā le silafia e teine ma tama a'oga i a'afiaga o lenei upu i le soifuaga i Samoa nei ma le fa'atinoina o a latou Tu ma Aganu'u mamalu a Samoa o lo'o tiu ai.

O le fa'amasani pea e tautala i ai i lenei fatua'iupu, e avea ai lenei fuaitau e limata'ita'i seseina ai o latou talitonuga i le fa'atinoina o Aganuu fa'avae a Samoa.

Autu : “Lavasiga o Fa'avae o Suafa Sa'o, ina ua sui faiga i le fa'asafua o Suafa Sa'o o aiga.”

Ulufatuina o Suafa Matai.

O le avea ma se matai, o se tofi po'o se vala'auga mai le Atua. O se ua fa'amamaluina e vaelua i ai le suafa o le Atua. O se vala'auga na afua mai i le nu'u o le Atua, e pei ona folasia manino mai e le Tusi a Kenese 36, e ala i usuga e tolu a Esau i fafine Kanana, lea e maua ai matai o le aiga sa Heti, Sa Hivi ma sa Hori ma amata ai loa le nuu o Esau i Etoma. Usu Esau ia Ata le afafine o Ailona le sa Heti fg o Elifasa. Toe usu Esau ia Alipana le afafine o Sepeona le sa Hivi fg o Iuso, Ilama ma Kara. Toe usu Esau ia Pasemata le afafine Isamaeli fg o Reuelu.

Ma na avea ulumatutua o nei usuga e tolu e fai ma alii sili o ituaiga e pei ona taua i luga. Ae o latou suli lea na totofi ai matai pitovao o le nu'u o Etoma.

O le ulufatuina la o suafa sa'o o aiga i le nu'u o le Atua na amata mai lava e tasi. Ma sa fa'apea fo'i le tulaga na fofoa mai ai suafa sa'o i Samoa nei. O suafa sa'o o aiga o se tofiga ua mautu lona

fa'avae ua atofaina e ala i le pule, lagisoifua ma fa'asinomaga, laei ma lauvae, tapu ma sasa o suafa sa'o o aiga, lea ua afaina ina ua fa'asafua suafa sa'o.

Ma o le ala fo'i lea o le faiga fou lenei, o le tofia o se Fa'aaloaloga o se nofo a suafa, ina ia mafai ona faatino lagisoifua o se suafa sa'o e tusa ai o faavae o le Aganuu ma Agaifanua. Auā e le mafai e suafa pitovao ma suli o le aiga ona agavaa uma i ai. O le fa'atinoga foi o nei lagisoifua o suafa sa'o, e le mafai e suafa uma o se nofo a suafa ona fa'atofusia i ai i le fa'atinoga o nei lagi-soifua. Ma o le mafuaaga tonu lea ua toe fo'i ai le nofo a suafa e filifilia se FA'AALOALOGA a se nofo a suafa ina ia mafai ona fa'amalieina mana'oga o le Faavae o suafa matai sa'o, o le filifilia o le tasi, ae le o le to'atele po'o le fa'asafua o suafa.

Pule Faa-sa'o.

E talitonu le fai pepa, o le tofiaina o suafa sa'o i aso ua mavae na pule fa'a sa'o, e ala i se mavaega a le Sa'o po'o le Alii Sili o aiga. A o'o ina ifo le la ma taolia fo'i le fala i le soifua o se alii Sili, ona potu foi lea o Faleupolu ma le aiga ma fesiliga le siitaga o le mavaega a se Alii sili, po'o ai e fa'aauauina le gafa o le fale. O ai lava la o suli o le aiga e mavaea'ina e le sa'o, o ia lava lea na te fa'aauauina le gafa o le fale, po'o le nofoia o le suafa sa'o o se aiga.

E pei o le mafua'aga lea e tele ai fa'ai'uga a le Faamasinoga o Fanua ma Suafa i tua atu 1920, sa tele ina faapea mai, “Afai ae uma le soifua o Siaki, e leai sana mavaega e fai, ae toe foi le filifiliga o le suafa Siaki i le aiga potopoto.” O lona uiga, o mavaega lava a suafa Sa'o na tofia ai suafa sa'o o aiga i aso ua mavae.

O le tofia fo'i o suafa Sa'o i aso ua mavae, sa le'i tele ni agava'a mo'omia i se tagata e tofia ai o se matai sa'o. E pei o le tulaga sa lilifa i ai le tofiga o matai sa'o i aso ua mavae, o le TAUTUA. Sa le'i tilotilo tele i le potu salalau po'o se tamaoaiga, po'o le alofa e pei ona tau fesiligia e le Fa'amasinoga o Fanua ma Suafa i taimi o Fa'amasinoga. E pau lava le tulaga sa tilotilo i ai le tofiaina matai sa'o:

O se tagata sa tautua matavela fa'amaoni, e afua ai le upu Tautua Tuavae; O se tagata e iloa upu o le aiga po'o tapu ma sasa ma lagisoifua o le suafa ma iloa le Aganuu ma lelei le utuvagaga, e afua ai le Tautua Upu; O se tagata e toa e le pala'ai e puipui ma malu ai le suafa ma le aiga, lea e afua ai le upu Tautua Toto.

Ma le suli ai tau malele, e le misi i le tautuaina o le aiga i mea e fai poo mea e finagalo i ai le sa'o o le aiga, lea e afua

ai le upu Tautua Mamao.

E pei o le agava'a numera tasi lea sa ave i ai se fa'amamafa a se sa'o e tofia ai se isi na te fa'aauau le suafa o le aiga po'o le gafa o le fale. Ae peita'i, ina ua fa'atula'i mai le pule fa'asuli, o i tonu lea na tau amata mai ai le fa'asafuaina o suafa sa'o.

Pule Fa'a-suli.

O se tasi nei o faiga na afua ai ona fa'asafua suafa sa'o o aiga ina ua fa'atula'i mai, “le pule faasuli.” Le pule lea na amata ai ona tele finauga ma aumai malosi le aia tatau fa'a suli, auā o le pule lea na amata ai ona aga'i mai suli ma aiga i le Fa'amasinoga o Fanua ma Suafa, e saili le pule ma suli fa'avae moni o le suafa.

E tele la ni suiga ua amata ona alia'e mai, ma ua avea ai fo'i ma ala ua amata ai ona fa'asafua suafa matai sa'o, auā o le tele o aiga ua omai e talosagaina le fa'aitūpaepae o suafa, fa'afuaifale suafa, fa'afaletama suafa, fa'amāvaevae filifiliga.

O suiga tetele nei ua amata ona tula'i mai ai le fa'asafua o suafa, ina ua pule fa'asuli suafa, ma ua avea fo'i lea faiga ua le mafai ai ona taofiofi le fa'asafuaina o suafa matai sa'o, ona ua tele magavai o le filifiliga, auā e fa'amavevae loa filifiliga o se suafa sa'o i ni itupaepae po'o ni fuaifale o le suafa, ona sa'oloto lea o ia itupaepae i le tele o le fuainumera e o'o i ai le tele o o latou suafa matai sa'o.

Palota na o matai.

O le isi tulaga na sasao fa'aafi ai le fa'asafuaina o suafa Sa'o, o le vaitau 'a'o palota na o matai i le palotaina o Sui o le Palemene auā, o le fa'amoemoe autu lava o lea faiga, ia tele ni matai Palota o le Itumalo, ma o se tasi lenei o ala na matua saosaoa ai le fa'asafuaina o matai sa'o.

Si'itia le potu salalau ma le tamaoaiga.

O le isi tulaga ua vave ai le faasafuaina o suafa matai sa'o, ona ua si'itia le tulaga o le ola a'oa'oina o suli o aiga ma tutupu ai lagona o le taua o le avea ma se matai sa'o, ma ua tutupu ai manatu o suli, “o ai o le a le fia pa'i i vai o le tama.”

Ma ua amata fo'i ona lagonaina le upu lenei, “o aia faasuli po'o le aia tatau a le suli.” Ma o lenei upu o lo'o mafuli lona fa'aleoina e suli ua lava le ola a'oa'oina ma ola i le tulaga o aia tatau fa'atagata soifua.

O ni isi o fanau ua lava le a'oa'oina ma tulaga lelei i galuega ua tutupu ai manatu i le fai o sona suafa matai, ona e matai uma le pulega a la latou

Faasoa o le Vaiaaso: E sui faiga ae tumau faavae—3

Matagaluega. Ona talosagaina fo'i lea e matua le sa'o o aiga, se'i alofagia ma fai se siaki o la'u tama lua te nofo lua, ona ua maualuga lava lona tulaga i le galuega. Ae o lenei fo'i tama poo fanau i lenei vaitau ua le o toe fia nonofo i ni suafa vai matai po'o ni matai pitovao, ua tagisa lava i se suafa sa'o.

Suli e nonofo i fafo.

O le isi tulaga ua saoasaoa ai le fa'asafua o suafa sa'o, o suli ma feoi o lo'o nonofo i fafo. O nisi o tamafanau a suafa ua avea ma failautusi po'o ua mau tofiga i totonu o le aulotu. O lo'o afaina le sa'olotoga e tautala ai po'o le noatia o le fa'aali sa'oloto o se manatu, ona e leai sona suafa matai. Ona malaga mai ai fo'i lea i Samoa nei ma talosagaina le matai sa'o, ae a pe a fai sona suafa Siaki e la te nofo lua ai e tausi le aiga?

E tausi atu e oe le aiga i Samoa nei, ae ou tausia le aiga i Niu Sila. Ae le gata i lea, o se fa'anaunauga a matua o lo'o soifua ma ola i atunu'u i fafo, aemaise lava i latou na fananau ma soifua a'e i Samoa nei, i le le mapu o le titi, tātā i le fanau e alolofa mai i le aiga i Samoa nei, ae peita'i o le agaga moni lava o matua ia 'aia ne'i motusia lo latou gafa po'o le pule i le suafa Siaki, ne'i mea ane ua ō mai le fanau i ni aso o i luma ae fa'asinolinolima i ai le aiga.

E talitonu o se tasi lenei o ala ua saosaoa ai le faasafua o suafa sa'o, o le taumafai lea o matua e una'i le fanau ina ia lagona le taua o le umia o se suafa matai o aiga. Ma o le ala fo'i lea e mafuli ai le finau a matua nei e nonofo i fafo i taimi o talanoaga e fa'asafua suafa sa'o o aiga.

Una'ia faia o matai tama'ita'i.

O le isi tulaga ua fa'ateleina ai le fa'asafuaina o suafa sa'o, o le tule'i malosia a le vaega o fa'alapotopotoga a tamaita'i o lo'o finauina ma fa'alauiloa le aga tutusa o Alii ma Tamaita'i i so'o se tofiga i totonu o le atunu'u, "e o e fai ni o latou matai ina ia fa'aaogaina o latou tomai e tautua ai aiga nu'u ma le Malo."

Ae o le fesili tele o lo'o fetogia'i fa'asoi o tuaoi e le itupa o tamaita'i ma le itupa o alii e faapea, "se fa'avae o le aganu'u le fai o ni matai o tama'ita'i?" E pule oe i lau tali, ae pau le popolega o le televave ma le saoasaoa o lenei suiga. Ou te talitonu o se tasi lenei tulaga ua matua saoasaoa ai fa'asafuaina o suafa sa'o, ona o mea nei o tamaitai e ese le televavave i le fa'ataunu'uina o ni fuafuaga fai. Ona e

fai mai se tasi o talitonuga i nei aso, "ae e fia maua se tala alu i tamaloloa, a e fia mana'o i se mea e fai, alu i tamaita'i."

Na ou matamata i le Samoa Observer ma ou matauina ai le tele o saofa'i o fai nei, o nisi o taimi ua sili atu le to'atele o matai sa'o tamaita'i nai lo alii. Atonu e le o toe mamao se vaitaimi e sili ai le aofa'i o matai tama'ita'i, nai lo alii. Ma o se suiga lenei o le a fa'atelevave ai fo'i le fa'asafuaina o suafa sa'o o aiga.

E tele ma anoanoa'i nisi o mafua'aga na fa'asafua ai suafa matai. Ae ou te talitonu o le mafua'aga autu ua fa'asafua ai suafa matai, ona o le tau fa'amalieina o mana'oga o tagata, ona ua si'itia le tulaga i a'oa'oga ma le si'itia o le tulaga o le olaga. Ma le fa'aupuga lenei ua fai ma a'upega malosia, "ua tupu ma ola aiga."

Lavasiga o le fa'asafua o suafa sa'o.

O nei la mafua'aga uma e pei ona ou tau fa'apupula atu e uiga i le fa'asafua o suafa sa'o, ua tula'i mai ni faiga fou ua manunu ai fa'avae taoto o le aganu'u, ma ua fa'ateleina ai fa'afitauli po'o lavasiga i totonu aiga ma nu'u.

Ae le gata i lea ua faatupula'ia le taugata o le soifuaga, ona ua mana'omia le tele o mea e fa'amalieina ai lagisoifua o se nofo a suafa. Ae le gata i lea, ua le mafai e se nofo a suafa ona ola ma soifua i fa'asinomaga ma lagisoifua o le suafa. Ma ua le o toe taua le upu lenei, "o le ala i le pule o le tautua," ona o lea ua ta'i \$1,000 le tau o le tele o matai sa'o o aiga.

Fa'aaloaloga

A silasila toto'a ma mata'ituina lelei e le mamalu o sasao nei le uiga ma le agaga tonu o le faiga fou lenei a se nofo a suafa e filifili so latou Fa'aaloaloga. O le agaga tonu lava lea na faavae ai e le aganu'u le filifiliga o suafa matai sa'o, ina ia tasi le leo, tasi le ala i malo, tasi le ta'ita'i, tasi le pule ma e tasi fo'i le suafa e mafai ona soifua i fa'asinomaga ma lagisoifua o le suafa. Ma o lea lava ua toe fa'afo'i e le faiga lenei o le Fa'aaloaloga a se nofo a suafa le Fa'avae na ulufatu ai le Aganu'u ma le Agaifanua le filifiliga o suafa matai sa'o.

E talitonu la le faipepa ua taua tele lenei faiga o le Faaaloaloga e toe fa'amanatu mai ai i aiga, e tasi lava le

suafa e tatau ona filifilia e tausia le aiga. Aua o le agaga tonu na fai ai le faiga fou lenei o le Fa'aaloaloga, ina ia fa'afaigofie ona fa'afie le aiga i le aloa'ia lea o lagisoifua ma fa'asinomaga ma le pule a le suafa sa'o. Auā o fa'asinomaga ma lagisoifua o se suafa, e tasi lava le suafa e mafai ona soifua ai.

Ae peita'i o le faiga fou lenei o le Fa'aaloaloga, ua aveesea ai le avanoa o isi o le nofo a suafa e soifua ai i le pule ma le fa'asinomaga ma lagisoifua o le suafa. O le Fa'aaaloaloga o se tasi o suafa o le nofo a suafa ua ave i ai le fa'amuumua a le nofo a suafa e aga'i uma i ai fa'aaloaloga ma laei i lagisoifua ma fa'asinomaga o le suafa, ae le gata i lea, o ia e fa'aleoina se finagalo o le aiga i le saofa'iga a le nuu ma avea ma taiulu o le fa'afieina o le nofo a suafa ma le aiga.

O le fesili ogaoga lava ua tula'i, "Aisea la na fa'asafua ma fai ai le to'atele o lenei nofo a suafa pe afai e to'atasi le suafa e mana'omia e le Aganu'u e aga'i i ai fa'atinoga o tiute ma matafaioi a le suafa sa'o, e pei ona toe faia nei e le Fa'aaloaloga a se nofo a suafa?"

E foliga mai o le faiga fou lenei o le Fa'aaloaloga, o lea ua toe fa'amautuina ma toe fa'asa'o mai le sese o le faiga lenei o le fa'asafua o suafa, ona e na o le tasi lava le suafa Sa'o e mana'omia e aga'i uma i ai faamanuiaga, le pule, Lagisoifua ma faasinomaga ua atofaina i se matai sa'o. O le fesili la, "o le a la le taua na fa'asafua ai suafa sa'o?"

Fa'ata'ita'iga

O ni fa'ata'ita'iga e fa'amaonia ai le leai o se taua na fa'asafua ai suafa sa'o. O le tele o suafa o se nofo a suafa, a fai fono a nu'u ae la e nofononofo i lalo o ulu, po'o la e nofo ma talatalanoa ma isi suafa i le umukuka. O le fesili aisea? O le tali, ona e le mafai ona ofi uma le nofo a suafa i le pou e tasi ua atofaina e le saofa'iga mo lea suafa, e le mafai fo'i e le nofo a suafa ona taumamafa uma i le 'ava o le feiloa'iga.

E le lua ni tofa a se suafa i fonotaga a nu'u. O le fa'asafua la o suafa sa'o o lea ua manunu ai le fa'avae o le aganu'u e fitoitonu i se suafa sa'o.

O le suafa Sa'o, o se tofiga ta'ita'i. O se ta'ita'i o se lafu mamoe. A sili atu i le tasi le matai sa'o ona logo ese'ese lea o mamoe.

O le fa'avae o le aganu'u, o le suafa matai sa'o, o le Pule. Le pule lea a le matai sa'o, lea ua tau sui i le tausi mea ina ia talia gofie e tagata, ma 'aia ne'i logo a i le faalogo le upu pule fa'a-sa'o. Peita'i e tatau pea ona faia le mea moni ma sa'o. O le a le mea moni? O le tali : o le mea moni, o le matai sa'o na tofia e le Atua e pulea aiga ma le Atunuu. O le fetalaiga a le Alii fa'aola, afai e iloa e outou le upu moni e fa'asa'olotoina outou e le upu moni. E

Faasoa o le Vaiaaso: E sui faiga ae tumau faavae—4

fa’asa’olotoina i latou o lo’o taumafai e fa’asili i le pule a le matai sa’o, o le malamalama o suli e to’atasi se suafa sa’o o le aiga e tatau ona tofia ma filifilia.

O le anofale atoa o le aganuu o le Pule. O le pule e afua ai Tu ma Aganuu. O le pule na fa’ataoto ai aulape po’o fa’avae e ta’iala ai le va nonofo o tagata o le aiga, le va nonofo o aiga ma le nu’u, ina ia malu le filemu i totonu o aiga ma le nu’u. Ma o lena pule e mai le Atua ia. E leai la se mea o le a tatou taumafai ai fua e sui le upu “Pule” i le upu “Tausimea.”

Lavasiga ma fa’afitauli ua tula’i mai:

Afaina tupu’aga ma fa’asinomaga.

Ua afaina fa’asinomaga ma tupu’aga o suafa, ona ua to’atele le nofo a suafa. Ua iai taimi ua tula’i mai ai fe’ese’esea’iga i totonu o nu’u, ina ua taumafai nisi o le nu’u e lu’iina measina a le suafa, ona aga’i lea o le isi o nofo a suafa ua lagolago le itu o lo’o fa’ataute’e ma lui’ina le tupu’aga ma fa’asinomaga o le suafa, ona o ni fe’ese’esea’iga i le va o le nofo a suafa.

Su’e lanu i le suafa.

O nisi o suafa o le nofo a suafa, ua faatau le tofi i le ai e tasi, po’o ua su’e lanu fo’i i totonu o le nu’u e ala i lona lagolagoina o finauga a nisi o suafa o le nu’u o lo’o lu’i’ina le pule ma lagisoifua o le suafa lea e suafa ai, ona o se fe’ese’esea’iga a lea nofo a suafa. Ma o le pogai lava o nei fa’afitauli, ona ua fa’asalafa ma fa’asafua suafa.

Afaina le fealofaniga ma le maopo’opoga o le aiga.

Ua afaina le fealofaniga ma le maōpoōpoga o Aiga, e talu ai ua to’atele le nofo a suafa ua logo ese’ese ai fo’i le auaiga. Ma ua fevaevaea’i aiga. Ua le toe iai fo’i se mafutaga a le aigapotopototo a le suafa, ona ua manatu ifo lava le suafa ia i lona tino, ae tu’ulafoa’i isi tino. Mai lea faiga, ua malepe ai le upu aigapotopototo i le filifiliga ma le taupulega. Ma ua le toe i ai se fai mea fa’atasi o le aiga.

Faiga fou o le faaaloaloga.

Ua le mafai e se nofoa suafa ona soifua uma i lagisoifua ma laei o se suafa e tusa o fa’avae o Tu ma Aganu’u, ona o se faiga fou, ua fai le Fa’aaloaloga a nofo a suafa. O le to’atele o suafa o lea nofo a suafa, ua na ona matamata a’o soifua le Fa’aaloaloga i fa’asinomaga ma

lagisoifua o le suafa.

Ua lē tāua le upu, o le ala i le pule o le tautua.

Ua leai se taua o le upu lenei, “o le ala i le pule o le tautua.” O le tautua o le tulaga sili lea ona taua sa filifili ai se suafa matai sa’o i aso ua mavae. Ona o le tagata tautua o ia lea sa va’ai ma fa’alogo i le auala sa fa’afoe ai e le matai sa’o le aiga ma le fa’afeagai ai ma le nu’u.

Sa ola i aso uma ma fa’afeagai ma le sa’o i mea e fai. Ua na iloa ma malamalama i lagisoifua o le suafa, e puipui ia malu tapu ma sasa o le suafa. O se tagata sa oe i taimi uma e vala’au ai le sa’o. O se tagata sa fofola i luma o le sa’o fua o aga fa’aele’eleaga ma ana fa’atamasoali’iga. O le ala lea o le upu lenei, “o le ala i le pule o le tautua.”

Peita’i o nei aso ua fai saofa’i a le nofo a suafa ma o nisi lava o taimi ua o’o i le ta’i 100 matai e fai fa’atasi saofa’i, o ai lava la e maua le tusaga ta’i \$1,000 ma le ie tele, ona fai fa’atasi lea o latou fa’afotu Tupu ma le fa’afotu o le Va’aulu. Mai nei faiga ua le mafai ai ona faamalie faavae o le aganu’u ua atofaina mo le fa’atinoina o se fa’afotu tupu ma se fa’afotu o le vaaulu, ua le mafai ona vaaia aganuu matagofie, o le paolo o se tauali’i.

Ua avea la nei faiga to’atele o Saofa’i ua ave’ese ai le fa’atauaina e nisi o le fanau o saomatau ai i le faiga o nei suafa sa’o. O le ala fo’i lea o le le manatu mamafa o suafa fa’asalafa i tapu ma sasa o lona suafa.

Pule a le suli moni.

Ua afaina le pule a le suli moni, ona o nisi o taimi ua fai saofa’i a se nofo a suafa mai fuaifale po’o faletama ese’ese o le suafa, ae ua tau fa’aofi ma maua ai lea o le avanoa e fa’aofi mai ai se nofo a se tagata ese i totonu o se faiga saofa’i. O lenei la faiga o le fa’asafua o suafa, ua tele faiga fa’aalatua ua afaina ai fa’avae o se suafa sa’o e tusa ai ma filifiliga a suli moni.

Suafa ulufatu ma le suafa igagato.

Ua afaina le pule a le suafa ulufatu, ina ua lui’ina e le suafa igagato. O se tasi lenei o aganu’u ua televave ai le tele o le fa’asafuaina o suafa o aiga ma ua afaina ai foi fa’avae o suafa. Ona ua iai taimi ua aga’i mai ai suafa igagato e finauna lagisoifua ma fa’asinomaga o le suafa na ulufatu i le suafa.

Ae peita’i o le suafa igagato e le’i iai i le taimi na ulufatu pe afua ai fa’avae

o le suafa. Ae ua avea ai fo’i lea tulaga, ua tele ai finauga ma vevesi i totonu o nu’u ma afioaga, ona o nisi o suafa igagato o i latou ua maualuga le tulaga o le poto salalau ma maua fa’ailoga maualuluga, Ona taumafai ai lea e fa’aaogaina o latou tomai ma le silafia e fatu ai ni finauga e suia ma talepe ai fa’avae taoto ulufatuina o lea suafa.

Ua fa’atupula’ia Fa’amasinoga o Fanua ma Suafa, ona ua tele manatu ese’ese ma lagona o le nofo a suafa. O le to’atele o se nofo a suafa, o le fa’ateleina fo’i lea o finauga ma fevaevaea’iga o finagalo ma manatu. Ae le gata i lea, o le nofo a suafa e aia tutusa uma i le pule, lagisoifua ma fa’asinomaga o suafa.

‘Au’upega a le Suli fa’aalualuō.

O le fa’asafuaina o suafa sa’o, o se tasi lenei o faiga ua fai ma ‘au’upega malosia ua fa’aaogaina e le suli fa’aalualuo ma le fa’aloloto e toe saofaga ai i le umia o le suafa sa’o o le aiga, lea sa umia e lona tama fa’atoa mavae atu.

O le tele o taimi o talanoaga a aiga e filifili ai se matai sa’o, ua atagia ai pea le toe tagisa o se atalii o le sa’o na se’i fa’ato’a mavae atu e faapea, e a pe finagalo malilie lo tatou aiga e toe tu’u mai le avanoa se’i ona toe fa’aauauina ai le tausiga o le aiga, ma fa’amae’a galuega tuua a lona tamā.

Afai la ae le aloa’ia e le aiga lea tagisa, ona taumafai loa lea o le atalii lenei e finauna le faasafua o le suafa, ina ia toe saofaga ai i le suafa. Ma o se tasi lea o fa’afitauli o lo’o tupu mai i le fa’asafua o suafa sa’o.

Afaina le vaitagata.

O le fa’asafua o suafa sa’o o aiga, ua afaina ai le vaitagata, ua leiloa e i’u o aiga, ulu o aiga. Ua fai kegi le nofo a suafa i totonu o le nuu. Ua fa’atupula’ia le faitogafiti o le lautinalaulelei i totonu o le nuu, ona ua toatele le nofo a suafa e fai ma o latou ‘alofaga e pupuni ni a latou faiga fa’aalatua i totonu o le nu’u. ma ua fa’atupula’ia finauga ma fevesia’iga i totonu o aiga ma nuu.

Fa’amalieina le tupu ma ola o le aiga.

O le fa’asafuaina o suafa matai o se faiga ua finau malosia e ni isi o le mamalu o le atunu’u e faapea, “o se faiga e fa’amalieina ai le tupu ma ola o aiga.” O le fesili la ua tula’i mai, O le fa’asafuaina ea o suafa sa’o o aiga e faamalie ai le tupu ma ola o le aiga?

Po’o le agaga tonu na foafoa ai e le aganu’u le faia o matai sa’o e fa’amalie ai le tupu o aiga? Po’o le matai sa’o ea o se tofi e i ai ni ona tiute tauave ma ni matafaioi fa’apitoa e fitoitonu i le suafa sa’o e faia i le aiga?

E talitonu le faipepa ua tatau nei ona toe autalu manatu ma fesiligia le agaga tonu

Faasoa o le Vaiaaso: E sui faiga ae —5

na ala ai ona ta'i tasi matai sa'o na fa'avae ai suafa sa'o o aiga. O suafa sa'o e lei afuafuaina e fa'amalie ai le tupu ma ola o aiga.

O le suafa sa'o na faavae:

“O se tofi po'o se valaauga ua iai tiute ma matafaioi, pule ma fa'amanuiaga ua atofaina mo lea tofiga e ao ona fa'amalieina ma soifua ma ola ai le ua tofia i lenei tofiga, ae le o se tofiga e fa'amalie ai le lautele o tagata po'o le tupu ma ola o se aiga.”

O le mea lea, e sili atu le tele o fa'afitauli ma fatiatāma'i e tutupu mai i le fa'asafua o matai sa'o i totonu o aiga nai lo le tumau i le tasi o le Matai Sa'o. E afaina fa'avae papa o suafa. E afaina tulaga mamalu o suafa. E fa'aitiitia le tulaga mamalu o le suafa ma ua le mafai foi e suli o le suafa ona lagona le taua o le suafa pe afai e fa'asafua le suafa sa'o o le aiga.

Ae o le isi tulaga e tataua ona matauina, o le fa'atupula'ia lea o le fa'asiliaupule ma le anuilagi o suli o le suafa i le fa'asafua o suafa sa'o o aiga. Ou te talitonu o nei lavasiga uma ua afua mai, ona ua fa'asafua ma fa'asalafa suafa sa'o.

O le fesili, O ai e mafua ai?, o le Faamasinoga ea po'o suiga mai fafo? Ou te leai atu, o i tatou lava ua talia nei faiga ua lavasia ai le tulaga o le suafa sa'o i totonu o aiga. Ma e tele la fesili ua tula'i mai i lenei faiga e fa'asafua suafa sa'o.

Ma o fesili nei ua tula'i mai.

O se fa'avae ea lou suafa sa'o e te tutu i lalo o le ulu, ae o la e papae le saofa'iga a le nuu?

O se fa'avae ea o lou suafa sa'o, e te si'i laulau i le isi matai sa'o?

O se fa'avae ea o lou suafa sa'o, e na'o lou piilima ma faalogo ae o fa'ataoto le tofa a lou nu'u?

O se fa'avae o lou suafa sa'o e te le faalagolago i se pou o le suafa, pe e te taumafa i le igoa ipu o le suafa?

O se fa'avae ea o lou suafa sa'o o lou taumafa i le umukuka, 'a o lo'o taumamafa le saofa'iga i totonu o le maota?

O se fa'avae ea o lou suafa

sa'o o se ave feau a isi matai sa'o?

Afai e te le o soifua ma ola i fa'asinomaga ma lagisoifua o lou suafa sa'o, o le a ea la le uiga o lou matai sa'o?

O lou suafa sa'o ea, ua na o se mea e fa'amaufaaailoga ai lou tagata, pe ua na o se mea e te tiu ai?

O le mea lea, sa sili ai lava ona fa'asuafaina oe i se suafa pitovao o le suafa sa'o, e te saofa'i ai i le saofa'iga a le nu'u ma tautua i suafa sa'o o le nuu. Aua afai e te le soifua ai i lagisoifua o le suafa sa'o, o lona uiga o lou matai, “o lou matai ua na suafa e faalagi ai lou matai.” E taua lou “iloa” o lou suafa matai, ae silisili ona taua lou soifua ma ola ai i lagisoifua o lou “iloa.”

Le paia e, o sasao nei, talofa ua solo le falute, ua masofa le fa ua tafea pulu i vai, ona ua gau le auau sa tau 'aso i ai le fa'avae o le Aganu'u, ina ua lilifa le poutu na tofofi e le Atua e maua'a ai le fa'avae o le Aganu'u.

Talofa e, o lele fo'i ua tausaili se upu e sui ai le upu, “pule fa'asa'o,” se'i fa'amalie ai le aia tataua so'onafai.

Ae peita'i o lea lava na sa'afi tama fafine a lou 'ele'ele, ae o lea fo'i na tau'ula'ula ai le tauasuasua o le tauafiafi o ou taulele'a ma pepese, “Na tofia e le Atua Samoa ina ia pulea e matai, auā o lona suafa na vaelua i ai.”

Tumau i ou fa'avae ma lou tagāvai, ona tumau lea o manuia mo Samoa.

O taofi faaalua ma le tofa sasaa a le faipepa o ana ia mea, e le atagia ai se manatu o lenei Tautua.

O lenei pepa sa ulua'i fofogaina e le faipepa i le laumua a'oga Le Papaigalagala, i lana fono lona 7 o Measina a Samoa, 2016; o le autu o le fono, E sui faiga ae tumau faavae.

O le afioga ia Tuiā sa avea ma faipule mo Safata i le paea'iga na se'i mavae atu.



O se solo mo le Aso o Tamā

Saunia e Levi Tavita



I SE ASO LAOFIE

O se ata o le Tamā i lou tua'ā ma lo'u tamā

I se aso laofie e te iloa atu ai ia o tauasa ane i le aloalo tuufua;

le laina e apitā ai galu i lona sulugatiti, ma se upega fagota e tautau ifo i lona fatafata.

I se po maninoa e te iloa atu ai ia o lolō lana pa i le tuloto, le masina mamalu ifo faapei se ie silika i luga o le fogāvai;

E te toe ala a'e i le taeao o la foi e tuu mai i le aloalo,


i se foli e atoatoa pe ā; faasifo lemu ma fuafua sana e fai;

pe tu faamataga e mata'i le si'ulagi vavau o augatausaga le māmoe; Le mano maumau; Le mau—le faitau miliona o nisi fetu ua ta'ape atu e ala i le lafoga fai fai pea o lana upega.

Ua amata ona e sa'afi i lona onosa'i, vi'ia lona tiga i nei tausaga e tele, talu ina avea oe ma tama valevale, e matau filemu lona fana'e ma liu faatasi ma le tai.

E faatagata e i'a le foafoaga.

Solo faavae—On a clear day i le tuisolo Moon Kites (EVALEON)



1 - 8 SETEMA

01

1900 Tatala a'oga teine
Atauloma i Tutuila

1905 Lolomi uluai kopi Savali
Samoa

1985 Faaulufale malumalu
Baha'i Afiamalu

02

1879 Tofia se pulega tumaoti
mo le taulaga o Apia

03

1939 Amata taua lona 2
lalolagi

1939 Tapuni falemeli Siamani

2011 Faaali ata Samoa The
Orator i Venice Italia

04

1871 Taunuu le Alameda ma
se faamomoli meli muamua i
Apia

05

1888 Tu'i e le vaa Siamani
Adler Manono ma Apolima

1997 Tatala lotoa Le Papa i
Galagala Vaivase

2015 Talimalo Samoa
Taaloga Faavaomalo Talavou
taupulega Peretania

06

1984 Talanoa Samoa e lua i le
mataupu o le soofaatasi

07

1866 Faamau e Ta'uga se
maugamu tatanu sasao a'e
i gatai o Olosega

2009 Sui le itu e feoa'i ai
taavale i Samoa

08

1857 taunuu Misi Taiseni i
Manono amata galue ai

1931 Fai tautoga uluai
taupousa Samoa i Moamoa



A ATOA AI le 130 tausaga talu le
tu'iga o motu o Manono ma Apolima
e le vaatau Siamani; le Adler, e le
pine e iai ni molimau a ni tua'a sa
soifua i lea vaitau tonu, sa tuufofoga
mai. Ae le taumate o se lagona

tulaga ese lenei mo i latou sa iai ma molimauina.
E le faatusalia aga o taua e masani ai Samoa ma
le suiga fou o taua ina ua taunuu papalagi ma
latou fana tetele ma manua. Ua leva ona
fa'aaoga e pule Europa auala faamata'u e faaaoga
ai fanafanua i luga o malae poo manua o taua;
pe na ona tafana e faalotovaivai ma faataapeape
ai le fili. I aga o le pulega i lea taimi, sa taulamua
vaatau Siamani i na faiga faamata'u. Faaapei o ni
leoleo taufaafele e o atu e momoli le savali a le
malo i se leo malos. E iai le Adler, lauiloa i lo
tatou tala; na amata lana tautua mo le neivi
Siamani i le 1883, a o lona faatinoga, o Samoa ma
ona upufai. Ua faamauina lona tu'iga o Manono
ma Apolima i le 1888 o lana galuega muamua lea.
Na mafai ona pu'eina Malietoa ma molia atu e le
Adler e faaaunuu i le atu Mariana. Ae na vave
lona iuga ina ua osofa'i e le afa o le 1889, na
gogoto ai faatasi ma isi vaa e ono, maliliu ai ni
seila se 155. O le Adler le tasi vaa na iloga lona
pagatia i le toatele o lona auvaa na fano ai. Na o
se toaono o lona auvaa na sao mai ai. O toega o le
Adler ma isi vaa na fai ma vaaiga i lumafale o le
taulaga; e molimau i lo tatou tala o mea sa
tutupu. Na tonu i ta'ita'i o Samoa e faaea i luga le
eleele ma tanuma'i ai toega o le Adler. O lona
tuugamau lea e manatua ai i lo tatou tala.

*Ata: Toega o le SMS Adler ma le SMS Eber o loo
tanumia i totonu o le Elele Fou i Apia.*

Setema i le Tala Faasolo o Niu Sila



2 Setema 1960. 2 auro a Niu Sila
taututuu Olimpeka i Roma

3 Setema 1958. Ulua'i taotoga o le fatu
i Niu Sila, Greenlane Aukilani

4 Setema 2010. Lulu mafui'e i
Kenetaperi, lepetia aai Kalaiesetete

6 Setema 1948. Faavae sitiseni Niu
Sila e afua i taimi pulega Peretania

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street,
Aranui, Christchurch 8061

All rights reserved. This bulletin and its content is protected by
copyright laws of New Zealand and international conventions.
Except for educational purposes, any other activity pertaining to
its use is prohibited. OLA understands the rights of other
copyright holders whose material we use and acknowledge
always—apart from our own.

Editor:
Levi Tavita, MPS, BTheol, BA, Grad Dip Tehg
ltavita8@gmail.com
Reporters:
Saili Aukuso, MA, BEd, DipTESL, DipTchg
saili.niupac@gmail.com
Vavao Fetui, MA, BEd, DipTESL, DipTchg
ola.niupac@gmail.com
Photographer: Fili Fuaava

EVALEON BOOKS & NIUPAC PUBLISHING




Sponsors:

*Evaleon
Books &
Niupac
Publishing*

Telefoni (03) 382-6674. Tuatusi meliE: evaleon.books@gmail.com

*Tautua e ala i le gaosia
o alaga'oa mo a'oga
(tusi mo le a'oa'oina
o le faitau i le gagana
Samoa, tusi e a'oa'o ai
gagana, kalena, posters,
yearbooks, brochures).
E tautua fo'i i le
fa'aliliuga o gagana,
ma le tapenaina o ni
tusi e fia lomina i so'o se
sionara o fatuga.*




TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or as directed.

ACROSS


1. ruled by (5)
 4. tracks (5)
 7. related to (3)
 8. tea bags (5)
 9. word to close prayer in Samoan (5)
 10. apple (3)
 12. holy (4)
 14. fence (2)
 16. cough (4)
 17. the (2)
 18. make (3)
 19. kick (2)
 22. rocky (3)
 24. enjoy (6)
 25. now (3)
 27. chameleon (3)
 28. atomic (7)
 29. customs (5)
- ### DOWN
1. blood (8)
 2. to turn over (6)
 3. eaten by pests (of cloth) (4)
 4. take pods off (4)
 5. may (4)
 6. load (5)
 11. car stops (2)
 13. completed, finished (4)
 14. flying fox (3)
 15. Custom: of giving person a matai title (6)
 20. be sent (5)
 21. body (4)
 22. ring (4)




LPSTavita 2018 Copyright

23. meaty (4)
26. a good catch (of fish) (2)

Tusi e fesoasoani:



Solution ~ Tali



Laufatu Samoa: O se tala faasolo

O le peleti o Alifi



NA gata la tatou tala i le telefoni a le tulafale ma lona taus, lea ua mae'a, a ua sauni nei e tali le faaaloalo.

A o savali le faifeau o Alifi i le faleoloa a ua uma ona faatulaga le vaevaega o le \$60 o i lana taga. O le \$20 e ave i le avetaavale mo le penisini o le taavale. O le isi \$20 e faaleoleo mo le ulugalii ma le pepe, meaane ua taofia, ae mana'omia se tausiga i le po. A o le isi \$20 e faatau ai sa latou mea'ai o le aoauli. Ua le mataofia lona galala ua alu le aso, o lea ua mafua ai lona asia o le faleoloa. Ua ulufale ma aga sa'o atu i le pusaaisa o apainu. Ua to mai le apa Koko Kola ma savali atu i le teine faifaatau. Ua 'ata mai le teine ae na te le iloaina. "Talofa lau susuga a le faafeagaiga, o a'u o Tafale, sa ou a'oga i lau susuga." Ua tu le faifeau ma auau mai i totonu lau o le upega manatu. Na vave ona maua, o le ulavale mua i lana vasega i le itumalo a Sagaga. Ua ono nei pe fitu tausaga. "O le pisinisi a lo'u uso ma lona to'alua Saina, lea ou te vaaia." Ua faamatala Tafale i le isi pisinisi o loo ua amata i le motu i Salafai, toeitiiti mae'a; o loo fuafua e o i ai ma lona to'alua pe a mae'a tapena.

"Susu atu lau susuga i luma i le faapaologa, tuu mai ia te a'u .." Ua liliu le faifeau ma savali i fafo ma nofo ane i le nofoa i le tulimanu. I ona tua e taotao atu ai le faatauoloa ma le ipu mafolafola, o iai keke puua e lua, se ipu malamalama, ni moli se lua ma se fagu Koko Kola. "Malie lau susuga ona pau o mea ua maua o le faleoloa," o lana upu lea ma tuu ane le taumafataga i luma o lana malo asiasi. Ua faafetai atu i ai le faifeau. "Aua e te popole mai ae fai lau galuega. Faafetai tele." Ua savali le teine e fai faatau a isi o loo faatali, ae alo le faifeau i lana faamalositino.

Ua sesele e le tulafale o Maluelue le fasipovi o i lana ipu, ona 'u'u lea i lona lima ma lolo i le sosi. E le fiafia i se tui, e le masani ai. Ua aapa i le fasi talo ua pi'iniu. Ua loilo i le masima. E tele mea'ai a lona uso, e faigaluega lelei uma ma lona to'alua i le malo. O lona uso na alu uma i ai le malosi o latou matua i le a'oga, na mafua ai ona alu i a'oga lelei i le taulaga, maua foi le avanoa e sikolasipi ai i Fiti. Fo'i mai ua le toe fia nofo i se nuu, e sili ia te ia le taulaga e le tiga ai lona ulu. Lea ua fai lo laua lava fanua ma le afafine o le Saina faipisinisi lausilafia i Saleufi. Ae le mafai ona tuu se mea e lona uso pe a sulu atu i ai i se fesoasoani.

Ua aapa lona lima i le sipuni ae iloa atu le ata o le faifeau i le 'au iila; lale e nofo ma tilotilo mai. Ua asu le supo ma mafaufau pe o le a sana tala e fai i le faifeau. A alu ma se mea'ai lona uiga ua leva le tatau ona alu. Ae e le o se mea lelei le alu atu ma se mea'ai a o lea ua uma ona tali lana sua. E sili pe a tuu. Ua iloa lana tali e fai. Ua lava lona potomasani i le faiva. O ia o le tama tuai i le a'oga nofotumau a Lau'ole. E pei le pepelo ia te ia o se taaloga o le mafaufau. Faapei o se alafusu i le tama faipele ua iloga le agavaa. A o le'i aga'i mai le tu'i a ua iloa le pito e 'alo i ai. Fai mai tagata e tuufaafegai lelei i laua ma lona uso.

"O lea ua tapena le meatausami a lana susuga e te maluu ma oe," o lona uso lea. "Leai, ua uma ona ou avea le seleni i le faafeagaiga. E \$80 na ou avea i ai e fai ai sana taumafataga; ae tuu le \$20 i le tama lea e ana le to'alua i sa latou mea'ai. Ou te le alo tamala i tulaga ia, leaga o lea ou te tu i le tofi." Ua tulei le ipu i luma. Ona tu lea lona uso ma sii ane le apa fafano ma le solo. Ua tatafi le tulafale ma faafetai. Ona tu lea ma faapea lana upu, "Ia, o le a ou alu, leaga o loo faatali mai le faafeagaiga." Ua momono ane e lona uso se pepa \$100 i lona lima, ma faapea atu, "Leaga o lona ua alu au tupe." "Oi, ia, faafetai." Alofa atu ia Fau ma tamaiti pe a fo'i mai." Ua faatofa ma tuumuli loa.

E lei atoa se 10 minute o le talisuaga a le faifeau, ona tula'i lea ma sauni e toe fo'i atu i le falema'i. Na iloa mai e le teine o Tafale ma nati mai i fafo e faamavae. "A fia maua se mea e malolo ai e avanoa lo ma fale, pe a o le a se fuafuaga," o lana upu lea.

"Faafetai tele Tafale, ae masalo matou, e toe foi lava pe a maua se tonu o le tina ma si pepe. Ae toe feiloa'i foi, mea sili o lea ua iloa mai lou afio'aga." Ua taliē, ae lei iloa e le faifeau le taimi na momono ai e Tafale se pepa i le taga o lona peleue. *E faaauau*

O palo mo tamaiti:

1. Ua maluu se tamaloa ona fo'i atu lea i le lagi. Na muamua tau atu i le agelu a le Alii ma le auauna a Satani. E tutu mai i se magatolu e faasino le ala. O le faalavelave auā na te le iloa poo ai lea, e le ta'ua mai foi poo ai laua. Afai e fesili le tamaloa poo fea le ala i le lagi, ona faasino lea le lima o le agelu i le itu taumatau, ae avanoa le auauna a Satani e filifili i isi maga e lua; poo le ogatotonu poo le agavale. E to'atele e manatu o le maga ogatotonu o le ala sa'o, ona sese ai lea. O le a le fesili e tatau ona fesili ai le tamaloa? E tasi le fesili.

2. O le manu e pei o le elefane lona lapo'a ae leai sona mamafa? O le a lea manu?

Tali Palo OLA 26:

1. E tatau ona ave muamua le manu, nonoa lelei ne'i sola. Foi mai avatu le taga araisa. Toe foi mai ma le manu tuu ae ave le pusi. Ona toe foi mai lea avatu le manu.

2. Na mafua ona lauga Lālā ona e aiga Līlī ma Fa'i. O Līlī le isi igoa o Fa'i. Lona uiga e o mai i le aiga e tasi.

